

中華律藏

中華律藏

第五十八卷

近現代高僧學者講律（十七）

國家圖書館出版社

菩薩心戒釋義

黃書雲



佛
小叢書
學

菩提心戒釋義敘

菩提者覺也。無覺心者。是謂愚癡。以其昧自本心。而無惡不作。將沈苦海也。明覺性者。是謂之佛。以其見自本性。而萬德俱圓。遂登道岸也。自常人以至於佛。無不視覺之。大小心之垢淨。爲區別一念。覺一念。善念念。覺念念。善。馴至戒德圓滿。戒行精純。善不自善。覺無所覺。因發無上菩提之心。自證無上菩提之果。但凡夫在迷。不能自覺。惡心日蔽。善心日消。無以覺之。至死不悟。聖人垂慈憫苦。欲醒羣迷。故作爲戒條。使知警惕。儒有三戒。道有九真戒。佛有

在家五戒。出家沙彌十戒。比丘二百五十戒。菩薩十重四十八輕戒。詳略不同。無非使人觸目驚心。終身恪守。以改過而遷善也。戒有警懼。防閑懺悔。遵守諸義。小人無忌憚。故作惡不悛。今以戒開其警覺之心。而生其恐懼之意。使知犯戒。則必墮三途。地獄餓鬼畜生苦趣可畏。則有所怖。而不敢爲惡。知守戒。則當生天堂。幸福可樂。則有所慕。而勉於爲善。此警懼之義也。既知三途之可畏。天堂之可樂。而善念不堅。惡念難制者。以此戒禁遏之。惡念初起。立即掃除。善念偶萌。隨時保守。則善心不滅。而天堂可登。惡心不熾。而三塗可免。此防閑之義也。凡人善者少。而惡者多。從善難而爲惡易。有

未聞道理。素少修持。心念言行。久滋罪垢者。以此戒啓悟之。使知天理循環。罪報不爽。幡然愧憾。無地自容。懺其前愆。深自刻責。悔其後路。不再發生。改過自新。回頭是岸。以功補過。棄暗投明。上之可學爲仙佛聖賢。下之亦不失爲端人正士。此懺悔之義也。知非艱行之維艱。旣知由懼生悔。由悔生憤。而或善心易退。惡念時萌。無所憑依。終將懈怠。逐條分晰。俾得遵循。庶知孰爲身惡。孰爲口惡。孰爲意惡。分之可以隨時而省察。合之不外固有之良知。此遵守之意也。方今人心大壞。劫運已臨。欲使回心。必先明善。茲不言他戒。而獨兢兢於此十戒者。蓋以身口意爲諸戒之本源。培其

本而枝自茂。澄其源而流自清也。此十業見華嚴經。犯之者爲十惡。修之者爲十善。昔龍舒居士爲淨土文。復真居士輯資糧集。均於此十業。諄諄致意。極力表彰。良以殺生、偷盜、邪淫、爲身三業。妄言、惡口、兩舌、綺語、爲口四業。貪欲、瞋恚、愚癡、爲意三業。三業俱惡。是謂純黑業。所以墮三塗。三業俱善。是謂純白業。所以生天堂。犯之者有多少。修之者有純駁。各區別爲上中下品。爲果報之輕重焉。所謂君子循天理。故日進於高明。小人從人欲。故日就於污下也。特所謂爲菩提心戒者。言欲發菩提心。必先守如是戒。十戒不守。爲菩提障。十戒克舉。爲菩提根。華嚴經曰。發菩提心者。當發慈。



悲心。柔和心。忍辱心。廣大心。寬博心。堅固心。又曰。忘失菩提心。修諸善法。是名魔業。忘失尙爾。況未發乎。故知欲學如來乘。必先發菩提願。十六觀經。亦謂欲生極樂國土者。當發菩提心。是知欲發菩提心。當以十善業。爲去垢之初法。既修十善業。更當以發菩提心。爲入道之要門。今特采集羣言。逐條解釋。以期同登覺路。共出迷津。人可不真心持守。而忍於背覺合塵也哉。

南榮黃覺謹識

重刻菩提心戒釋義序

謙軍人也。不稔佛法。而喜聞佛理。今年秋。將至榮。聞幕僚盛稱黃書雲先生。以名下士。精研內典。政學軍界中人。爭崇拜之。及晤談時。以素所服膺陽明學相質。先生謂陽明學近禪宗。歷舉萬國宗教。誌佛教篇之言告。豁然意解。因索所著菩提心戒釋義讀之。理精而確。詞暢而達。無義不搜。無弊不抉。誠滌垢之上藥。指迷之良導也。每三五日。輒詣覺園。談心學。獲覩福田論。及所輯一藏經摘要。尤多精蘊。不惟見所未見。亦聞所未聞。此行爲不虛矣。因先



生勸修淨土宗。流覽經論。心境益空。道味盎然。至爲愉快。已而聞遠近索書者至夥。春初排活字版三千餘部。不足以饜人之求。他邑已三刻棗梨。而榮獨否。甚非所以揚佛法。挽世變也。遂捐貲鑄版。存諸覺園。以公同好。竊聞佛法中有兩種健兒。一者生不作惡。二者作已能悔。方今風習日偷。道德益墮。欲回劫運。先正人心。然非廣明佛法。使上者志宗乘。度衆生下者信因果。明禍福。不可且菩薩從十善心。等入四十二心。乃至成佛。是書發明十善十惡。以剝蕉抽繭之思。分風擘流之筆。不惜十指絃。爲君千萬彈。世果有思救世者乎。願多印而廣布之。視其他勸善書。相去何止倍蓰有



疑吾言者。請細讀一過何如。
四川陸軍第二師第四旅旅長子
鳴廖謙謹識

佛
小
叢
書
第
一
菩
提
心
戒
釋
義

一
殺
生

生者。凡有血氣。知覺運動之物。一切胎生。卵生。濕生。化生。生於水。行於陸。飛於空。無足。兩足。四足。多足。無不自愛其生。即不可故傷其命。凡人一念之仁。即是生理。一念之忍。即是殺機。故殺生爲五戒之首。亦爲比丘二百五十戒之首。亦爲菩薩五十八戒之首。不殺則大善。殺則爲大惡。三教聖人。立教不同。而獨於殺生。則無不諄諄垂戒者。以死者不可復生。斷者不可復續也。孟子曰。見其生。



不忍見其死。聞其聲。不忍食其肉。呂祖曰。欲知世界刀兵劫。但聽屠門夜半聲。華嚴經曰。菩薩於一切衆生有命者。常思利益慈悲之心。是諸菩薩。尚不忍心惱諸衆生。何況以惡意而故行殺害。蓋惻隱之心。人皆有之。欲體天地好生之心。自當守聖人不殺之戒。夫賜牲必畜。孔子推其仁。見牛不忍。孟子許其王。遠庖廚者。爲君子。推遠庖廚之心。必不殺一物而後卽安。貪口腹者。爲小人。極貪口腹之欲。卽日殺三牲。猶爲不足。天下有仁心偶萌之小人。未有殺心未斷之君子。與其心安於忍。毋寧世笑爲迂。自古聖賢仙佛。博學通人。苦口婆心。殷殷勸戒。如楞嚴梵網之垂訓。感應陰陽之

格言。好生救劫之篇。戒殺放生之訓。徵引既詳。流傳亦廣。原書俱在此。不贅陳。惟殺之之道甚多。戒之之法亦不可不慎。凡親手斷其生命者。爲自殺。由我造意。使人斷其生命者。爲教人殺。見人殺生。多種助成其殺者。爲方便殺。見人殺生。讚成許可者。爲讚嘆殺。乃至見殺隨喜者。與自殺同。見殺加怒者。與助殺同。其心既大違於慈悲。其事卽大反乎仁義。縱曰養親供祭延賓。有時或不能盡絕。然於無可如何之中。存一力從節省之意。他品不妨多設。何必多糜生命。備極肥甘耶。况珍饈羅列。祖宗未必親嘗。甘旨奉親。刀匕何堪屢赤。至取彼至切之生命。供我閒泛之人情。造自己身後

之過愆。娛他人目前之口腹。是亦不可以已乎。高忠獻公曰。省殺一命。於吾心有無限安處。程明道曰。人苟存心於利物。於人必有所濟。朱子曰。人心若仁。則萬物在吾生育之中。佛經以見殺不食。聞殺不食。爲已殺不食。爲三淨肉。此爲未能斷肉者。不得已之計。欲人以漸除殺也。夫一針刺肉。而其痛徹心。沸湯燙指。而渾身欲裂。人若不深思之耳。昔洪州廉使問馬祖曰。喫肉是不喫肉。是師曰。喫是中丞祿。不喫是中丞福。蓋人能充其不忍之心。不惟我不忍殺。卽他人所殺者。亦不忍食。此仁至義盡之說也。先德云。人能一日持齋。不食肉。則世界殺生我皆無分。楞嚴經曰。以人食羊。羊

死爲人。人死爲羊。食餘衆生。亦復如是。死死生。生互來相噉。惡業俱生。窮未來際。汝負我命。我償汝債。以是因緣。窮百千劫。常在纏縛。清淨比丘。及諸菩薩。於歧路行。不蹋生草。况以手拔。云何大慧。取諸衆生。血肉充食。故曰。世上欲無刀兵劫。除非衆生不食肉。楞伽經。佛告大慧。有種種因緣。不應食肉。偈曰。爲利殺衆生。以財網諸肉。若無教想求。則無三淨肉。然則買食之。與自殺僅差一間耳。將以視親操刀斧者。稍有不同。今人卽不能斷肉。獨不可習於少殺。食三淨肉。以期於漸絕耶。若感應篇所謂射飛逐走。若人離家出外。路被害殺者。也。發聲驚棲。若人寢室安處。忽遭兵戈殘賊者。

也。填穴覆巢。似人居室樂業。一朝水火蕩盡。族類俱亡者也。傷胎破卵。似人正在孕育。忽被摧殘。賊害者也。以人比物。何忍爲之。至於牛之有功。犬之有義。雁之有序。鯉鱸之朝斗。此等之物。何忍食之。若夫屠釣漁獵。以資生。網罟鉤刀。以謀利。養牲養繭。以營業。他人得其用。而我獨造其殃。多人享其成。而我獨膺其罪。觀彼之不作此業者。亦未嘗無衣食。亦未嘗受凍餒。何苦種地獄之深因。受來生之惡報耶。而鎗鳥燒蜂。以恣閒遊。殺龜打蛇。以爲慣習。醉鰕割蝸。剝螺剝蟹。以供饕餮者。更當知所戒矣。月令曰。草木零落。然後入山林。昆蟲未蟄。不以火田。此感應篇所謂昆蟲草木。猶不可